

PROBA DE ACCESO Á UNIVERSIDADE (PAU) 2025

1. ESTRUCTURA DA PAU

A proba de acceso á universidade consta de dúas fases: unha fase xeral e unha fase específica.

1.1 FASE XERAL

A fase xeral é obrigatoria refírese ás tres materias comúns cursadas en 2º de Bacharelato(Lingua Galega, Lingua Castelá II e Literatura II e 1ª Lingua Estranxeira II), 1 das materias comúns: Hª de España ou Hª da Filosofía, a elixir 1, e a materia específica obrigatoria de modalidade(Matemáticas II, Matemáticas Aplicadas ás CCSS II; Latín II). En cada proba, o alumnado disporá dunha única proposta de exame con varias preguntas. O alumno/a terá que responder, en cada exame, ás preguntas obrigatorias e ás da súa elección, tal e como se sinala en cada materia.

Cada un destes exercicios terá unha duración máxima dunha hora e media (90 minutos).

Haberá un intervalo mínimo de 30 minutos entre o final dun exercicio e o comezo do seguinte.

Para cada exercicio pódese utilizar calquera das linguas oficiais da Comunidade Autónoma, excepto para Lingua Castelá, Lingua Galega e Lingua Estranxeira, que deberá realizarse nos seus respectivos idiomas.

Cada un dos exames desta fase xeral puntuase de 0 a 10 puntos, con dúas cifras decimais, redondeada á milésima máis próxima e en caso de equidistancia á superior.

1.2 CONVOCATORIAS DA PAU

No curso 2024/2025 as datas das dúas convocatorias son:

CONVOCATORIA ORDINARIA: 3, 4 e 5 de xuño

CONVOCATORIA EXTRAORDINARIA: 1, 2 e 3 de xullo

O alumnado que participe na convocatoria ordinaria poderá presentarse á convocatoria extraordinaria para a mellora das cualificacións. Terase en conta a cualificación obtida sempre que sexa superior á anterior.

1.3 CUALIFICACIÓN DA FASE XERAL (NFX)

Cada un dos exercicios da parte obrigatoria cualificarase entre 0 e10 puntos, con dúas cifras decimais.

A nota da fase xeral será a media aritmética das cualificacións de todos os exercicios, expresada en forma numérica de 0 a 10, con tres cifras decimais, arredondada á milésima máis próxima e en caso de equidistancia á superior. Esta cualificación deberá ser igual ou superior a 4 para que se poida ter en conta para o cálculo da nota de Acceso á Universidade(NAU).

1.4 CUALIFICACIÓN DA NAU

Considérase superada a PAU cando se obteña unha nota igual ou maior a 5 puntos na media ponderada entre a cualificación obtida na fase xeral que conta un 40% e a nota media de Bacharelato (NMB), que conta un 60%, e que se expresará con dous decimais, sempre que se acadara un mínimo de 4 puntos na cualificación da parte xeral. Esta é a nota de acceso á universidade, $NAU= 0.4 \times NFX + 0.6 \times NMB$.

Para o cálculo da nota media de Bacharelato, para efectos de acceso á universidade, compútanse todas as materias cursadas no Bacharelato, agás a materia de Relixión.

A cualificación da fase xeral terá validez indefinida, sempre que se teña superada a proba de avaliación de Bacharelato para o acceso á Universidade e sen prexuízo de que poida mellorarse en futuras convocatorias.

1.5 FASE ESPECÍFICA

A fase específica permite mellorar a nota de admisión aos distintos graos universitarios. Cada estudante poderá examinarse dun máximo de catro materias, distintas das que se examinou na fase xeral, a elixir entre as seguintes:

- **Materias obrigatorias de modalidade** distintas daquela da que se examine na parte obrigatoria da proba.

- **Materias de opción do bloque das materias de modalidade** de segundo de Bacharelato.
- **Materia Segunda Lingua Estranxeira II:** Alemán, Francés, Inglés, Italiano ou Português (sempre que sexa diferente da opción cursada na materia troncal Primeira Lingua Estranxeira II).

A duración de cada exercicio será dunha hora e media (90 minutos) e haberá un intervalo de 30 minutos entre o final dun exercicio e o comezo do seguinte.

Materias de exame da Fase Específica

MATERIAS DE OPCIÓN DO BLOQUE		MATERIAS DE MODALIDADE
-Bioloxía	-Deb.Técnico Aplicado	- Matemáticas II/ Latín II
-Debuxo Técnico II	-Deseño	- Mates Aplicadas ás CCSS II
-Física	-Xeografía	- Debuxo Artístico II / Análise Musical II/ Artes Escénicas II
-Química	-Fundam. Artísticos	- Ciencias Xerais
-Xeoloxía e CCAA	-Tec. Expr.Gráf-Plástica	
-Tecnol. e Enxeñería	-Coro e Técnica Vocal II	
-Empresa e Mod. Negocio	-Hª Música e Danza	
-Grego II	-Literatura Dramática	
-Hª da Arte	-2ª Lingua Estranxeira	

É conveniente examinarse das materias que se corresponden coa rama de coñecemento onde se inscribe a titulación que nos interese, segundo as táboas de ponderación da CIUG e que ponderen 0´2.

As materias desta fase específica poden ser elixidas libremente, non sendo necesario que pertencan á modalidade cursada, nin sendo necesario que esas materias fosen cursadas.

A materia cursada como específica obrigatoria de modalidade como as outras 4 materias da fase xeral son materias da fase xeral pero tamén poden contar como unha materia máis da fase específica para o acceso aos graos que se inclúan como materia nas distintas universidades españolas, sempre que a cualificación acadada na materia correspondente sexa igual ou superior a 5.

1.6 CUALIFICACIÓN DA FASE ESPECÍFICA

Cada unha das materias da fase específica das que te examines será cualificada entre 0 e 10 puntos, con dúas cifras decimais, sendo necesario acadar una puntuación mínima de 5 para que pondere.

A nota acadada en cada materia multiplícase por 0´2 ou 0´1 segundo as táboas de ponderación da CIUG.

Estes resultados súmanse e engádense á nota de acceso, que é a media ponderada entre a nota de Bacharelato e a nota da fase xeral.

A cualificación obtida na materia xeral troncal da fase xeral, vinculada a cada modalidade (Matemáticas II, Latín II, Matemáticas Aplicadas ás Ciencias Sociais II, Ciencias Xerais, Análise Musical II, Artes Escénicas II e Debuxo Artístico II), tamén se terá en conta para mellorar a nota de admisión.

A cualificación das materias desta fase específica terán validez durante o curso que se inicie inmediatamente despois da realización da PAU e os dous cursos académicos seguintes a este, sempre que se supere na mesma convocatoria ou se teña superado en convocatorias anteriores a nota de acceso á universidade.

É recomendable presentarse á parte voluntaria da ABAU, xa que a maioría das titulacións universitarias de Galicia teñen número de prazas limitadas.

1.7 CÁLCULO DAS NOTAS DE ACCESO E DE ADMISIÓN

Nota de acceso = $0'6 \cdot \text{NMB} + 0'4 \cdot \text{CPO}$:

NMB: Nota Media de Bacharelato

NFX: Nota da Fase Xeral

Nota de admisión = $0'6 \cdot \text{NMB} + 0'4 \cdot \text{NFX} + a \cdot \text{M1} + b \cdot \text{M2}$:

M1, M2: Cualificacións dun máximo de dúas das catro materias das que se examina o alumno/a na Fase Xeral e/ou da materia troncal de modalidade correspondente, que proporcionen a mellor nota de acceso, unha vez aplicados os parámetros de ponderación

a, b: Parámetros de ponderación das materias da Parte Voluntaria e/ou da materia troncal de modalidade que proporcionen a mellor nota de acceso.

Un exemplo:

- Nota de Bacharelato: 8,60
- Nota da Fase Xeral: 8,300
- Nota de acceso: $(0'60 \times 8'6) + (0'40 \times 8'3) = 8'48$
- Materia 1 Fase Específica (pondera 0'2): 8'50
- Materia 2 Fase Específica (pondera 0'2): 8'80
- Nota da Fase Específica: $(8'5 \times 0'2) + (8'8 \times 0'2) = 3'46$
- Nota de admisión: $8'48 + 3'46 = 11'94$

Hai dúas convocatorias anuais: ordinaria(xuño) e extraordinaria(xullo). Un alumno pode presentarse en sucesivas convocatorias para mellorar a cualificación da fase xeral e/ou de calquera das materias da específica. Considerarase sempre a cualificación superior entre as obtidas. A superación da fase xeral da proba terá validez indefinida pero a cualificación das materias da fase específica terá validez no curso de realización da PAU e os 2 cursos seguintes á súa superación.

1.8 PROCEDIMENTO DE REVISIÓN

No caso de non estar de acordo con algunha das cualificacións obtidas, existe un procedemento único de revisión que consta de tres fases:

1º. En primeiro lugar analizarase se houbo algún erro material na corrección do exame da persoa interesada (sumas mal calculadas ou preguntas sen corrixir). No caso de existir algún erro material, modificarase a cualificación, tanto á alza como á baixa. A cualificación provisional obtida (identificada como P) pasa a ser a nova cualificación despois de ser modificada segundo o erro material detectado. No caso de non haber erros materiais, mantense como cualificación provisional a cualificación orixinal (identificada tamén como P).

2º. A continuación realizarase unha segunda corrección por un novo corrector/a especialista, distinto ao que efectuou a primeira corrección. Se esta segunda cualificación (identificada como S) ten unha diferenza menor de dous puntos, a cualificación definitiva será a media aritmética entre S e P, nomeadamente $(S+P)/2$.

3º. Finalmente no suposto de que existise unha diferenza de dous ou máis puntos entre ambas as cualificacións (P e S), un terceiro profesor/a especialista distinto dos anteriores efectuará unha terceira corrección (identificada como T). Neste caso, a cualificación definitiva será a media aritmética das tres cualificacións, nomeadamente $(P+S+T)/3$.

O prazo para solicitar o procedemento de revisión será de tres días hábiles desde a data de publicación das notas. A solicitude preséntase nos LERDs cun impreso específico ou directamente a través da aplicación Nerta.

2.-PROCESO DE ADMISIÓN E MATRÍCULA NAS TITULACIÓNS CON LÍMITE DE PRAZAS

O **proceso de preinscrición** para o acceso ás titulacións universitarias consta de 2 convocatorias, a ordinaria e a extraordinaria: **a convocatoria ordinaria vai do 19 de xuño ao 1 de xullo e a extraordinaria: do 17 ao 22 de xullo.**

Os **chamamentos para a matrícula** realizaranse progresivamente ao longo do mes de **xullo**.

As datas para a entrega de solicitudes de acceso serán as mesmas para todo o sistema universitario de Galicia e están publicadas na páxina web da CIUG.

Todos os trámites administrativos do proceso de acceso, deberán ser realizados a través da **aplicación NERTA** ou no LERD (lugar de entrega e recollida de documentación), que están repartidos polos diversos campus de Galicia. Deberá elixir o LERD do campus escollido en primeiro lugar na solicitude de preinscrición.

O alumnado deberá cubrir un único impreso de solicitude en Nerta, onde poderá indicar **ata cinco titulacións universitarias diferentes**, e un máximo de dez peticións no caso de que a ensinanza elixida se imparta en máis dun centro en Galicia.

A orde de adxudicación das prazas é a seguinte:

1º Primeiro adxudícanse as prazas a quen cumpra os requisitos en xuño do presente curso ou de anos anteriores.

2º En segundo lugar, adxudícaranse prazas aos estudantes que cumpran os requisitos de acceso na convocatoria extraordinaria.

En cada colectivo do apartado anterior adxudícaranse as prazas por maior nota de admisión.

A CIUG asignará as prazas en cada titulación en cada un dos prazos que se establezan. Haberá 8 prazos de chamamentos de matrícula. Publícanse os distintos listados ata outubro. Despois de cada listado dispónse de **dous días** para realizar a matrícula. **Se o alumno foi admitido na titulación de maior preferencia, deberá facer a matrícula nos dous días seguintes**, pois do contrario perderá todos os seus dereitos. **De ser admitido nunha de menor preferencia pode matricularse ou esperar** a ver se é admitido nunha titulación de maior preferencia ata que se anuncie o **peche** da matrícula nesa titulación. Suxírese que se faga a matrícula no 1º día do prazo para poder resolver calquera incidente que poida xurdir. **Durante o período de matrícula, o alumnado que non se matricule, deberá confirmar o interese en seguir nas listaxes da CIUG, xa que de non confirmalo entenderase que non ten interese nas titulacións solicitadas e decaerá nos seus dereitos.**

Poderase consultar os listados de espera no Nerta, accedendo co contrasinal, e valorar a posición na que se atopa na lista de espera.

O alumnado poderá presentar reclamación á súa asignación de prazas no LERD onde presentou a súa solicitude de acceso.

2.1.PRIMEIRA CONVOCATORIA DE MATRÍCULA:

- Se o solicitante aparece convocado para matricularse na titulación da súa primeira preferencia, deberase matricular no prazo establecido, do contrario perderá todos os seus dereitos.
- Se o solicitante aparece convocado para matricularse nunha titulación que non sexa a de primeira preferencia, poderá esperar a matricularse nela en tanto non se peche a matrícula nas titulacións solicitadas con maior preferencia. No caso de matricularse nela ou en calquera outra titulación sen límite de prazas, decae dos seus dereitos de continuar no proceso de ingreso en titulacións con límite de prazas.

2.2. SUCESIVAS CONVOCATORIAS DE MATRÍCULA:

Despois da primeira convocatoria de matrícula poden quedar prazas vacantes como consecuencia de que algún dos alumnos convocados non formalice a súa matrícula. Neste caso, sobre as prazas vacantes realizarase unha reasignación automática de acordo cos mesmos criterios cos que se fixo a primeira

convocatoria e convocaranse aos alumnos para formalizar a matrícula, nos sucesivos prazos sinalados no calendario de matrícula.

As sucesivas convocatorias de matrícula anunciaranse nos LERD, na CIUG e Nerta.

Nestas convocatorias sucesivas o alumnado pódese atopar nos seguintes supostos:

- **Se o alumno/a é convocado/a para matricularse na titulación da súa primeira preferencia, deberá facer a matrícula, pois do contrario perderá todos os seus dereitos.**

Nota: Enténdese por primeira preferencia aquela que o alumno/a solicitou no primeiro lugar ou en lugares sucesivos no caso de se esgotaren as prazas ("peche") das titulacións solicitadas nas primeiras preferencias.

- **Se o alumno/a é convocado/a para matricularse nunha titulación de menor preferencia, poderá facer a matrícula ou non.**

De facela, a matrícula considerárase firme e non terá a oportunidade de cambiarse a outra titulación.

De non facela, poderá esperar a matricularse nunha titulación de maior preferencia ata o peche da matrícula nestas, o que se anunciará coa publicación dos sucesivos listados de admitidos e de espera.

O **peche de matrícula** dunha determinada titulación implica a desaparición automática das listas de espera, de xeito que non se volverá a abrir de novo a matrícula desa titulación.

En todo caso recordade que durante o proceso de matrícula, se non vos matriculades, deberedes confirmar o voso interese en seguir nas listaxes da CIUG, pois se non o confirmades entenderase que non tedes interese nas titulacións solicitadas e perdedes os vosos dereitos.

2.3.LUGARES DE MATRÍCULA

A matrícula poderá realizarse **nos centros** onde se imparte a correspondente titulación, ou **online**, accedendo aos enlaces de cada unha das universidades de Galicia, e que están dispoñibles na páxina web da CIUG: www.ciug.cesga.es

- UNIVERSIDADE DA CORUÑA: Nos centros onde se imparte a titulación ou a través de internet (<http://matricula.udc.es/matriculaprimeiro/>)
- UNIVERSIDADE DE VIGO: Nos centros onde se imparte a titulación ou a través de internet (<http://seix.uvigo.es/automatricula>)
- UNIVERSIDADE DE SANTIAGO: a matrícula deberá facerse a través de internet (<https://matricula.usc.es/MatriculaPrimeiro/Login.asp>)

2.4. RESUMO CALENDARIO PAU 2025

CONVOCATORIA PAU 2025	DATA
ÚLTIMO DÍA PARA A AVALIACIÓN FINAL 2º BACHARELATO	14 de maio
RECLAMACIÓN CUALIFICACIÓN BACHARELATO NO CENTRO	19 e 20 de maio
MATRÍCULA ANTICIPADA ONLINE para PAU de titulados de FP ou BACH de anos anteriores	Do 5 ao 19 de maio
PREMATRÍCULA PAU NOS CENTROS DE SECUNDARIA (para titulados en maio 2025)	Do 15 ao 19 de maio
CONSULTA DA LISTAXE PROVISIONAL DE MATRICULADOS E RECLAMACIÓN SE PROCEDE NOS CENTROS DE SECUNDARIA	22 de maio (ata ás 13:00h)
MATRÍCULA ORDINARIA NA PAU POR PARTE DOS CENTROS NOS LERDS	21 e 22 de maio
EXAMES DA PAU CONVOCATORIA ORDINARIA	3, 4 e 5 de xuño
PUBLICACIÓN DAS CUALIFICACIÓN PROVISIONAIS e ENVÍO DA TARXETA DE CUALIFICACIÓN DA PAU	12 de xuño a partir das 20'00h(NERTA)
SOLICITUDE DE REVISIÓN ÁS CUALIFICACIÓN DA PAU ORDINARIA	Do 13 ao 17 de xuño (ata as 14'00h(NERTA))

PUBLICACIÓN DAS CUALIFICACIÓNS DEFINITIVAS E ENVÍO DA TARXETA DE CUALIFICACIÓN DEFINITIVA	19 de xuño (NERTA)
ÚLTIMO DÍA AVALIACIÓN 2º BACHARELATO CONVOCATORIA EXTRAORDINARIA	12 de xuño
RECLAMACIÓNS CUALIFICACIÓNS BACHARELATO CONVOCATORIA EXTRAORDINARIA	16 e 17 de xuño
PREMATRÍCULA NA PAU NOS CENTROS DE SECUNDARIA CONVOCATORIA EXTRAORDINARIA	Do 13 ao 16 de xuño
ENVÍO POR PARTE DOS CENTROS EDUCATIVOS DA DOCUMENTACIÓN DO ALUMNADO MATRICULADO NA PAU NA CONVOCATORIA EXTRAORDINARIA AOS LERDS	18 e 19 de xuño
CONSULTA DA LISTAXE PROVISIONAL DE MATRICULADOS NA PAU NA CONVOCATORIA EXTRAORDINARIA E RECLAMACIÓN SE PROCEDE	19 de xuño (ata ás 13:00h)
EXAMES DA PAU CONVOCATORIA EXTRAORDINARIA	1, 2 e 3 de xullo
PUBLICACIÓN DAS CUALIFICACIÓNS PROVISIONAIS E ENVÍO DA TARXETA DE CUALIFICACIÓN PROVISIONAL	10 de xullo a partir das 20'00h(NERTA)
SOLICITUDE DE REVISIÓN ÁS CUALIFICACIÓNS DA PAU EXTRAORDINARIA	Do 11 ao 15 de xullo ata as 14'00h (NERTA)
XERACIÓN EN NERTA DAS TAREXETAS DE CUALIFICACIÓN DA PAU EXTRAORDINARIA CON MODIFICACIÓN DE NOTA	17 de xullo